

卷十四

書名 烏鼠山人小集十六卷後集二卷 嘉靖十八年刊本
 撰者 明 胡纘宗 撰
 卷 卷十四
 內容分類 集- 別集- 明中葉
 索書號 集部- 別集- 7- 40
 編號 D7433900

[彩色首頁1](#)

[彩色首頁2](#)

[東洋文化研究所漢籍目錄 編號: D7433900](#)

[東洋文化研究所漢籍目錄所藏漢籍善本全文影像資料庫 索書號: 集部- 別集- 7- 40](#)

[漢籍善本全文影像資料庫文本烏鼠山人小集十六卷後集二卷 嘉靖十八年刊本](#)

版權所有: [東京大學](#) [東洋文化研究所](#)

[使用上的注意事項](#)

烏鼠山人後集卷之一

諸子胡祕 諸生關畿校

體四言 長短句附

我結

贈籍野馬翁以進也翁 肅府引禮舍人

我廬于籍之西嶓山連阜天水循谿秋空倚

我杖藜澄波鯉躍修竹鸞棲我觴我友于籍

我社于籍之東西望義闕北眺軒宮卦爻穆

鳥鼠山人小集目錄卷十四

鳥鼠山人小集卷之十四

問人庶城劉淵校

贊

文昌祠贊

北斗分魁內階置朝太常理文上將建武列星在曜
六星在府斯世攸瞻斯文式主邑旣右文坊固多士
惟靈照臨惟人仰止

張方伯心齋贊

萬象皆具一物不容太空皜皜止水溶溶報
主斯亦鑿物乃百道以為與理以為宅

宣聖贊



一以貫之金聲玉振是謂大成賢於堯舜教在六經道該羣聖生民以來未有獨盛

信國公文天祥贊

惟養浩然故立卓齋與聖賢伍為天下士吾惟從容成就吾是所求乎臣如此而已

辨

辨權載之為隴西人


先生唐名相也世為畧陽人貞孝先生先生之父也去禛山之亂而徙丹徒先生及其子璩乃始寓丹徒焉畧陽今隴右地也先代為畧陽道又為畧陽郡又為文州又為畧陽縣又為隴城縣今隴秦安縣乃為

隴城里里之父老猶有能述說先生世家者關中亦有畧陽縣漢沮地也其名始自後魏唐以前改為順政縣隸興州不為畧陽也今以畧陽字同而隴右畧陽之名不著遂以先生父子為關南畧陽人誤矣一統志既以先生系之關南畧陽及注其下又曰秦州畧陽人關南畧陽去秦州遠甚又非隴右地秦州且不屬關南豈非其誤哉唐諸集系先生者或曰秦州人或曰天水畧陽人或曰秦州畧陽人不系之關南也則其誤也明矣續宗謹辨

遂菴辨

或謂續宗曰吾聞元老楊公有菴焉命之曰遂海內

人士稱之亦曰遠望其外迥如宵如處其中洞如淵
如邃矣然吾嘗考公之歷履其始也坦如卓如其至
也炳如巍如而顧祇以遠名遠果足以盡公哉曰何
也公也讀書 秘閣奇童之名瑱瑒乎海宇豈以是
為非遠乎載筆中書執經者雲集督學憲司服德者
川湧其諸門弟子或為天下之傑或為三秦之豪豈
以是為非遠乎召為太常禮樂修備薦為中丞茶馬
蕃衍而其聲聞赫赫豈以是為非遠乎控制三邊敵
不牧馬底定西夏兵不血刃 朝中倚公如山在權
實亦敬公如神明豈以是為非遠乎起為司徒出納
惟允擢為太宰黜陟惟明引為 內閣輔相惟正



尋而譽流任重而惠溥豈以是為非遠乎曰然曰非
也皆遠也 秘閣遠于學也中書外臺遠于教也太
常都臺遠于聲容遠于謀猷也地曹遠于政也天曹
遠于治也 內閣遠于啓沃也何也童年而能古文
辭深造自得英華發之外也匪遠其曷彰乎門弟子
日衆傳心之奧日微斐然者文默然者理故人見其
時雨也而不見其化也匪遠其曷契乎禮樂修而和
節之本立駭牧蕃而塞淵之功深匪遠其曷闡乎運
籌帷幄折衝樽俎胸中富有甲兵醜虜聞風而懾服
匪遠其曷武乎財賦節而不費賢才簡而不遺統百
官以貞左右 天子以直而其轉移之妙密勿之微

有非羣寮所能測者匪邃其易格乎曰邃矣邃矣夫
邃于菴者豈獨菴哉學本于菴也教立于庵也禮樂
軍旅出於菴也政治輔相原于菴也邃乎其菴
之德乎菴乎菴乎其天下之廣居乎然則子見其外
而不見其內也見其粗而不見其精也曰唯今知邃
矣

喻

蘇州季考喻

國非賢不理賢非養不作然則 國家之所重者在
賢所急者在養矣是故用賢者君國之道而養賢者
凡百有司亦與有責焉 國朝於京師有學於郡與

邑有學於衛所有學養之制也於內教之以事父於
外教之以事君養之道也其崇尚所重而喫緊所急
也不亦詳盡哉蘇州南畿首郡自郡以下其學有九
而又有 一 塾養之不異於他郡然其所以養之則在
郡邑者與其師長者竊有媿焉蘇之賢才先後輩出
重節好文彬彬濟濟若無俟於養者然其職則不敢
弛也予聞宋安定胡氏嘗養士於蘇矣一日經義學
乎其治已者一日治事學乎其治人者故當其時其
諸門人往往知稽古愛人卓有成效古今養士者莫
及焉文正范氏蘇人也嘗自養矣自做秀才時便以
天下為己任及其至也則先天下之憂而憂後天下

之樂而樂而必以忠孝為本卒為本朝人物第一古今善養者莫及焉續宗與州縣守令職在提調者固不敢不以翼之為法程若我九學諸士子生乎斯地者可不以希文自期待哉此道在通而事在易者他日立朝以仰酬 國家養之之德如文正公之心行獨得聖賢之道而其功業烜赫百世夫豈不為天下首稱如吾郡如吾范氏也邪故事士之在學者提學察院歲考之府州縣季考之學官月考之三年京兆尹鄉薦之太宗伯會試之

聖天子廷試之而士始服官於平養之不為不慎而用之不為不重矣是歲又當鄉薦之期是月又當季考之期續宗及其期合而考之將以引於京兆而獻於 天子事竣竊見諸士子之文郁然而雲爛沛然而江行芒然而星麗嵬然而嶽峙大雅者春容奇偉者雋永持此以往可以華國矣人莫不鈔之以傳者州縣守令曰此可以見諸士子之養庶不愧於文正而吾人之責將亦不有藉於安定也耶予曰夫也安定善矣然有秦伯焉文正善矣然有子游焉秦伯至德也吾人所當師事之者也子游孔門高弟其文學非今之所謂文學也吾諸士子所當師事之者也蓋相與砥礪之勿徒曰文焉而已也

文

壽大伯母文

弘治十六年春家君官雙流六叔父官建昌置酒以別母母曰吾老矣猶記先舅尹南皮政聲琅琅二叔氏其無墜焉十七年秋伯兄紹宗繼宗自太學歸省續宗又將赴太學請別于母母曰見其請諸二兄自上國來必有以益兒也吾老矣今年冬壽且八十續宗以爲母果老矣及詢之則耳目猶能遠視聽身強健猶可細作女紅誡誨諸子姓猶壘壘不倦是非其家德哉母事大父大母孝事伯父恭遇家君叔父敬遇續宗兄弟子姓惠伯父從大父宦母不以爲富伯父里居母不以爲貧家德種種是宜其壽矣母坐於

庭諸伯叔父列于傍諸兄弟子姓走趨于下竟日盡醉我疑之慶餘論此矣惜續宗遠寓在途不在側也聞家君將致政自雙流六叔父將致政自什邡約明年春歸秦則明年壽誕之娛必有勝於今者續宗雖不在側何少焉續宗不得當筵以壽謹遙爲母壽壽曰願母期無疆願母德音無已母安之正德 年

日請賜胡續宗識

近思書附錄文

諸生胡續宗致告于濂溪周先生明道程先生伊川先生橫渠張先生考亭朱先生曰於維諸先生國步已從祀孔子廟廷矣願諸生何人何敢復僭祀

我然報德報功之私固非一遵一豆之所能盡此又諸生一念之誠歷百世而一轍合百人而一揆者也敢於此敬設五先生木主使諸生朝夕誦讀其中走趨其下者每一瞻拜庶有所觀法云爾敢告

二先生祠告文

後學胡纘宗敢昭告于和靖尹先生文靖魏先生曰允為治者必藉諸咨問是以有賓師焉惟二先生為宋大儒昔寓於蘇成以道德立於世者黃諸閭淑諸人故今蘇之人士仰德尤切於天下纘宗嗣守茲郡深懼亦薄無以考德而飭治敢以二先生之主設諸賓師之位庶朝夕瞻仰知所觀法而咨問賓友亦不

至離去也敢告

告文正公四子從祀文

考之故典周公配文王子思配孔子以聖述聖也宋文正范公為當朝人物第一 國家祠祀之於鄉尚德矣然其子將作公恭獻公忠宣公待制公咸能世德為時名人以之配享文正公非以賢述賢邪纘宗守郡之明年以是禮為郡之大者質諸郡中大夫士咸曰可乃與諸寮屬及其諸孫擬作四公之主以分配文正公用示崇德焉惟四公鑒之

告吳郡名宦文

聞之禮曰夫聖王之制祭祀也法施于民則祀之吳

大邦也諸君子臨蒞茲土軌物布德以擾其民民至
于今誦之不衰可謂法施之美續宗忝守於吳瞻企
前拵敬修祀典其吳伍公子胥宋胡公瑗 國朝夏
公元吉周公忱乃有專祀茲不敢瀆伏惟神鑒

告吳郡鄉賢文

古鄉先生之賢者沒而祭于社所以隆往而勸來也
諸君子產于茲邦名德聞望焯焯振世茲邦藉重焉
可不謂賢乎續宗忝守茲邦瞻企先拵敬修祀典其
吳公子游范公希文及其子長公純佑次公純仁純
禮純粹乃有專祀茲不敢瀆伏惟神鑒

河南布政司上梁告文

華堂肯構豈省具瞻官司致敬匠氏告巖吉日乃上
良辰載占神功赫赫神祚巖巖山岳攸奠雨露旁霑
崇陰覃被槐蔭胥弁輪奐歌美閭巷頌咸惟神昭格
惟靈樂耽

河南祈雪告文

乾坤生物天地佑人雨雪潤世土穀阜民田或告登
家斯稱足歲苟無禾廩焉有粟惟豫州地居中土惟
季月序屬隆冬惟歲暮三月不雨惟春初四野何農
齊民皇皇有司悄悄神告雖虔天聽若藐同雲雖布
密雪未施民望彌切官辜曷辭仰而思之匪天工之
愷是有司之愆匪百姓之辜寔度官之汙感旣有召



禱故弗應爰弛冬律乃行春令天譴昭昭民隱愷愷
責何能逭痛應愈切俯而思之保釐有未愜歟旬宣
有未至歟風紀有未振歟牧守有未備歟田賦有未
均歟軍旅有未輯歟訟獄有未允歟工作有未戢歟
如其然固皆職等之過不在下民倘有災咎願加職
等之身敢不剪爪截髮以期閉陽縱陰奮欲焚疋訟
風但求布澤作霖伏望早凝五穀之精大飄六出之
靈兆盈尺之瑞表表丈之晶濟瀆不靈嵩嶽無塵兩
河培九穗之麥八郡召兩岐之春申茲顛告鑒此微
忱

謝雨文

三則禾槁雨則禾秀否則禾敗槁則禾什什則歲凶
登則歲富富則民康凶則民蹙惟茲甘雨我公濛濛
我私霏霏我禾郁郁我稼祁祁雖天之澤實神之德
惟神之德實天之福續宗等切切為歲皇皇為民孩
孩為禾穆穆為神敢以牲醴奠之俎豆惟神在左惟
神在右

壽昭和王夫人孟母文

歲前閏月望日續宗以轉官將之濟上河清王銀
漢公鳳輿龍旂繡裳羽扇帥諸將軍綬冠博帶過子
官邸洗爵而酌揖而告曰聞子舊史氏也子母孟夫
人壽上表矣子帥諸子若孫將稱觴焉子盍為我壽

之續宗再拜而諾之既續宗走拜

王王進續宗于殿復告曰子母壽登七袞母儀秩秩也子帥諸子若孫將稱觴焉子盍為我壽之續宗再拜而諾之既續宗啓行至郊王俟于門洗爵而酌揖而復告曰子母壽登七袞婦道閑閑也子帥諸子若孫將稱觴焉子盍為我壽之續宗再拜而諾之是日續宗渡河而至曹南為之壽曰有昭和王乃有孟母有孟母乃有銀漢公觀銀漢公誠孝懇懇則知孟母美觀孟母誠敬翼翼則知昭和王矣子聞夫人閑哉夫閑則不殺不殺則壽子聞夫人儉哉夫儉則不煩不煩則壽子聞夫人靜哉夫靜則不震不震則壽



子聞夫人潔哉夫潔則不塵不塵則壽於嗟夫人不既貞淑美哉 河清王居汝城西南隅面對嵩岳嵩岳嵯峨朝視之如雲夕視之如霞夫人徘徊其間日融融焉夫嵩岳磅礴千百年如斯也夫人之靜似之其壽有不如岳者哉背瞰黃河黃河瀾漫春流浪浪然秋濤湯湯然夫人瞻顧其傍日洩洩焉夫黃河蕩漾千百年如斯也夫人之閑似之其壽有不如河者哉王聞之曰是壽之徵也是母夫人之祉也可以壽孟母夫人矣孟母夫人之懿德可以不沒矣可以報吾先昭和王矣可以慰吾子若孫矣某月某日夫人初度王稱觴焉諸子若孫獻彩焉錦瑟瑤琴鯨鐘鸞

鼓洋洋于殿簫簫于墀王及子若孫百拜而進曰願
聖善如岳吾子若孫日仰其高焉則吾子若孫世衍
其慶也願聖善如河吾子若孫日望其長焉則吾子
若孫世濟其美也夫人聞之輒然而笑曰有是哉

宗聖書院告曾子文

惟夫子從游孔門雖在後然朝三省夕一唯獨得一
貫之宗遂與其友顏子同稱焉而七十子不得並美
則杏壇之上孔子猶天也夫子與顏子猶日月也千
古並明後之學者仰照焉惟夫子寔生武城之隸濟
郡濟之人士凡在後學有志學道者莫不仰止續宗
來蒞行臺考德之餘敢設書院肅祀夫子以修大學
之業求一貫之道而宗至聖謹以濟人漢儒魏先生
應何先生休配惟夫子鑒之敢告

告濟郡二賢祠文

郡中故有二賢祠祀唐學士賀先生翰林李先生賀
先生嘗宰任李先生因賀先生寓于濟亦久而寓者
時則又有工部杜先生焉三先生唐文宗也其在濟
文章動河岳河岳因三先生而增重敢並祀之庶知
濟之人士敬仰三先生云敢告

告濟郡二節祠文

郡中翰林李先生節義重一世郡大夫之子翰林方
先生亦以節義立身方先生舊祀於斯李先生其先

覺也而又郡之鄉先生也敢並祀於宗聖書院東序
使濟之縉紳考其節欽其風並仰首焉敢告

告總漕尚書宋公文

惟公濬源道流功在漕河勅祠建主神在漕河今茲
告浚惟公協和惟公克和公祐斯多漕人戴公艦人
頌公匪公之相伊何公澤實多

論

四知論

震也從容以四知却金善矣而不能不起君子之責
備者知密有未盡動密有未至耳是故密苟賢邪當
不以金餽伯起矣伯起苟知密邪密昏夜當不餽以

金當伯起苟如伯夷邪密之金當不至伯起之庭矣
密苟如韓持國邪當不俟伯起故人知君君不知故
人天知地知爾知我知之諄諄矣夫賢當薦而薦密
為不賢不得謂之明德當報而密報為不正不得謂
之公嫌當杜而杜密為不嚴不得謂之知金當却而
却密為不潔不得謂之貞君子之責備者非以此邪
雖然相在爾室不媿屋漏震亦近之矣苟規規然責
備之則魯男子者果不善學柳下惠者邪

劉節婦論

臣臣子子婦婦而后天地地位臣不臣子不子婦不婦而
后天地有所憾天地亦大矣臣如舜如周公子如文

王如參婦如共姜才數人而止爾臣不能以皆臣子
不能以皆子婦不能以皆婦夫豈其理也哉然臣臣
則君君子子則父父婦婦則夫夫如其然也則和
則治 聖天子於忠臣於孝子於節婦每令臺臣必
甄別之者盡人之性也贊化育參天地也此 聖朝
之治之媿美乎三代也汝人劉母節婦也予聞劉母
既筮而背其夫漢家且貧子且幼劉母恒欲為其夫
死人雖力止之而劉母之心切切者至今也初以
其母之心使必為劉君雖死亦得家既貧子既幼為
其親教其子使劉君之目得瞑於地下不死
也果以守報劉君節也均

之為貞婦也於乎舉世如劉者予未之多見也而劉
之子林卒以詩舉于鄉為時聞人劉之家於是乎起
於汝美是固和之徵也嗟乎世之為臣老而如劉必
不辱其君為子者而如劉必不辱其父為婦而處劉
之地者而如劉將不榮其夫邪不辱其君則得其臣不
辱其父則得其子榮夫則得其婦臣得其臣子得其子
婦得其婦則百姓和百姓和則萬物若萬物若則天
地位夫何憾劉母今 旌為貞婦矣以貞率天下之
為婦者必劉母也 聖朝以風教化天下如劉母不
於 聖朝之化有補邪於乎古今之人亦衆矣而惟
忠臣孝子節婦為能傳古今之子亦衆矣而惟臣之

所
不
可
不
言

中子之孝婦之節為足傳若劉氏吾知其不朽矣

四子談壽論

碧苑仙子問於黃眉翁曰上古上壽中古中壽惟壽
臺惟時鴻濛其然哉然今之人亦有古之壽者其
然哉翁曰上中世惟時上中壽惟人故上世多聖上
賢多壽故上世而上壽時也中世而上壽人也僊子
唯唯已乃嘆曰吾觀方城揚房居今之世登古之壽
其時哉其人哉夫上賢不多得上壽不易致上賢而
上壽其惟碩人哉吾聞宜人少毓於華里長宦於真
方一椿並茂三桂聯芳今其壽期焉願焉者黃而健
若白而康是蓋其所賦獨昌也翁曰絳縣惟老高吾

惟申君宜人殆鍾燕山之秀而毓易水之英者邪是
以童顏兒齒鶴髮龜齡逐天之祿樹國之損天壽山
巒聞之莞爾而笑曰二子者知其所至而不知其所
自也來吾語汝汝不聞固安之有賢母如古申國夫
人者耶少出世家長歸巨室閨闈閑閑冠裳翼翼履
不出戶庭轂不聞閭閻教仲子學士以大雅大雅侑
侑教叔子中允以大道大道奕奕兩蘇文學二程道
德雖其所鍾淳龐亦其所培淵默也是以轂聞九域
年登八袞以告南極老人老人曰知壽之端而莫原
其始知壽之徵而莫考其極吁亦云勞矣故槐植而
王盛雀放而揚熾吾聞翰苑封君世累耆勳代積鴻

澤教遠而才士興輔 代而藩王懌衍慶之波履祥
之域爾乃馳內翰之恩堅左史之操荷 皇朝霞帔
之寵躋大家 鳳敕之褒三子登科二公及第聯翩
一麟閣追隨鳳池時享大官之醪日分七苑之薇爾
乃壽比麻姑懿同文母鑾坡鹿伏薇垣鶴舞膝下諧
頃莞之音 禁中繩橋梓之武抑人邪時邪三子斯
然曰其人哉是日宜人初度申允時爲東藩左丞乃
以板輿奉之堂背行省右丞與諸叅伯再拜而祝曰
至高惟泰山宜人對泰山而開筵其與泰山同高哉
行臺廉訪與諸憲使再拜而祝曰至大唯北海宜人
俯北海而稱觴其與北海同大哉昭武都尉與諸將
軍再拜而祝曰莫宜惟春宜人初度當春時和 其
樂琢琢花嬉鳥嬉其樂怡怡仙郎倒北海之樽卷子
捧南山之爵而侑宜人宜人食霞飫露含英咀華不
與春同長哉四子之論於是乎足徵也學士先生以
史局之舊書來索予文予不能辭繆爲論之以報先
生而壽宜人

傳

康處士傳

考之處士之志之銘之記之說曰處士幼而敏長而
知務學曰處士博洽經史恬退不仕曰處士之父溪
北君性嚴處士獨能得其歡心曰處士有兄曰延英

個儻豪邁處士敬愛之唯謹曰處士居父母喪祭一
循乎家禮曰處士善談論每談論必徵諸古而不疾
遽曰處士未嘗至公門有司以鄉飲請辭不就夫知
務學惠也得父之歡心孝也敬愛其兄友也喪祭必
循乎禮正也不疾遽和也樂恬退而不至公門守也
曰慧曰孝曰友曰正曰和曰守道也如其然仁也人
而仁焉賢也處士其能然乎哉安知今之人不能志
仁希賢亦如古之人哉處士姓康氏名蔓字延芝龍
泉夏溪人也贊曰以若處士之所爲今人之所難也
而處士能爲之則處士之所易矣能易人之所難又
何不能難人之所易哉以若所爲處士其果仁賢矣

傳

歲也丑走道出錦襄錦襄林守旣已遷鄖陽丞以去
謂走曰考有存孤者公聞之乎老人李景愈氏富而
多產有子皆不育景愈憂之妻劉與同邑竊
弘氏之妻兄弟也亦憂之乃力贊景愈娶曰非蚤不
可非多不可取一妾曰周亦未嗣納一妾曰王慮與
周不相能也處於外室而與弘近某歲王生子曰六
某歲周生子曰審旣而王沒劉懼六無托也給周曰
吾有子以單弱皆不育爾子亦單弱盍取一子借撫
之以期其成周曰云何曰吾富吾人亡覘吾者乎吾

多產吾人亡冀吾者乎吾嗣且幼吾人亡侮吾者乎周諾之於是抱六以歸且與審提携焉語諸人曰僭生者爾其人知之其周不知也某年月日景愈病既疾革素厚弘也邀而告之曰始吾未嗣吾憂之今吾已嗣吾憂之吾年才若干二子皆未倅周也少不可托劉可托髦美吾之孤其誰托吾富而多產吾族大而悍吾之孤其誰托弘曰是在我君亡慮景愈起謝畢遂絕未踰年審暴卒劉與弘之妻及弘皆疑之然莫能詳也劉驚且謀曰審不可育六亦不可育矣六之育周初不知今知悉寧加于審乎吾未亡人也如之何弘曰是在我任然君亡慮必是携六

育於其家曰吾已許之矣乃後周他適劉守景嗣業于內六育於外踰十餘歲某年六年若干矣以其情赴愬於開封尹開封尹下於睢守睢守獻其族不伏召弘証之不伏召周証之乃伏遂盡其顛末乃明其嗣復其家而旌弘之果於存孤錄劉之審於庇孤并請於監司監司許之于是引弘為鄉飲賓復劉之弟及其兄子以風郡縣公聞之乎蓋傳之走音其事義其人詢之考人考人以為然詢之錦襄人錦襄人以為然因敘之六年十有三矣

贊曰皆朋友也孰善於其父皆婦人也孰善於其家義利公私之間難乎其別焉耳若審翁之克全人之

孤不媿於其女矣劉姆之克在已之孤不媿於其夫
矣視世之朝游夕背面浹心妬者其相去何止倍蓰
耶可以風矣

銘

方思道硯銘

方子秋臺之有是硯也贈自光祿茹子銘自驗封胡
子銘曰

沾爾潤怡爾靜慈爾方懲爾剛蓋爾厚昌爾壽續宗
銘

中硯銘

惟是硯也惟其厚是以愛也惟其方是以莊也惟其

潤是以濟也惟其堅是以傳也

小硯銘

是硯也得之易守之難匪得之易遇之易匪守之
奉之難何以守之曰不磷何以奉之曰克貞

鐘硯銘

遂谷戴子謂予曰予有二硯一以贈子續宗再拜受
之既乃製而為鐘取其重也中也虛也容也宣也倫
也如其然也庶幾不辱於戴子也

戴子冠中人也山東提學按察副使

蘇州漏壺銘

壺斯釋斯心斯惕斯壺斯皦斯身斯高斯壺斯倫斯

畫斯甄斯壺斯永斯夜斯省斯壺斯注斯政斯叙斯
壺斯循斯人斯珍斯

碑陰

吳塘陂碑陰

是陂也其在漢也啓之者刺史馥也築之者太守元
光也其在 國朝也復之者尚書克嗣也鑿之者續
宗也同鑿者知縣儼也任鑿之之勞者經歷瑤縣丞
賓陽也漢以前陂未築也夫陂不築則無水田不水
則無禾是故陂築而田沃田沃而禾登故民之感之
也曰育我者劉也食我者朱也 國朝以前陂未鑿
也夫陂不鑿則隄不灌隄不灌則沃不長是故陂必

不濇而后水必不竭水必不竭而后田必不畱田必
不畱而后歲必不歉故民之悅之也曰生我者尚書
也壽我者令許也幕錢也丞李也若續宗之從事於
列則其分也夫築不固未有不決者是以有待於鑿
鑿不深未有不壅者不能不有待於浚矣嗣是而浚
陂以溉田以助歲以足民竊有望於後之君子

箴

五箴

其何可矜矜則畫矣其何可躁躁凶德也其何可不
重不重如敬何其何可欲速欲速如和何其何可奪
志於爲文作字奪志於爲文作字不亦失其本心也

哉

民箴五道

可泉子告曰父母生我養我我何為不孝我不孝父母父母何為生我養我我生子我愛之無所不至父母亦嘗愛我矣我顧不愛父母邪我薄父母我生子亦將薄我我心如何

又曰民去君之地遠不知君所以為民者切民之安居樂業皆君之賜而君之宵衣旰食皆民之勞故貢賦租納所以報君也而怠焉慢君莫大矣不知者且曰特輸之官耳身處治世凶怪乎其不知也

又曰兄弟之不和如妯娌之譖不曰爾兄

也爾弟欺爾爾不知爾弟則曰爾雖弟爾兄欺爾至此爾不如死言之諄諄聽者不覺其入而怨生矣吁妯娌異姓兄弟同氣異姓何親同氣何疎

又曰夫婦易衰而難敬妾則比我侮我敬則事我助我我之家所由興衰也民間寵妻凌妾者什六寵妾棄妻者什九吁妻尊而妾卑其分截然易以處也今不能處豈丈夫哉苟不能處不須妻妾矣

又曰民間無善交者交以善言久敬之道也今之交者朝則密如昆弟夕則背如仇讐其視久敬之道如土苴然言巧事從故密言直事忤故疎其密也以利其疎也亦以利以利而密以利而疎即路人耳奚以

交爲

筆箴與通天筆人

吾毫弗圓盍觀諸天吾毫弗直盍觀諸弦吾毫弗德盍觀諸乾吾毫弗精盍觀諸玄

遜志齋箴

高安朱生誥以遜志名齋可謂克學矣天水胡續宗爲之箴曰

曰高維天何物弗憍厥德則容虛以爲臆曰藏維海何川弗鄉厥德則下涵以爲量曰大惟心何理弗備厥德惟謙迺來迺華厥謙惟何匪謙以容容或匪衷厥進弗崇厥謙伊何匪謙以言言或匪恒厥積弗淵

厥謙伊何匪謙以心靡讓弗納靡訓弗承惟心日遜惟道日克念之厥始勿替爾終

金人箴二首

我思金人彼豈無言言者弗中其中則煩支誕何爲惟禍之門緘默何心乃德之原天何言哉日往月來地何言哉冬閉春開

爾胡不默默者心休爾胡不重重者身厚爾胡不簡簡者性逸爾胡不諱諱者神守我緘我口君子篤恭敢告金人唯君是從

戒

五戒

勿怠怠則業日荒矣勿浮浮則行日肆矣勿戲戲則
放放則大不敬矣勿多言多言則誕誕則人鄙我矣
勿多事多事則擾擾則我心其弗寧矣

對

觀齋對

八閩之表三山之陽有齋焉黃子之所居也兩楹玲
瓏四窓洞達高可以瞻下可以瞰遠可以眺近可以
玩黃子危坐齋中其心優游焉其體泮渙焉其始也
若有所見焉其既也若有所得焉客有扣其門往見
者黃子整冠出迎客揖而請曰子居是若何黃子曰
吾求吾心不為物誘吾求吾身不與世蔽操之有要

吾惟吾身聖賢為伍是謂齋不愧吾吾不愧齋客曰
觀之道其在內乎曰知人則哲審物為智人固有差
物亦不齊視若所以孰得孰失察若所安孰是孰非
妍媸乃別人不能隱幽明攸鑒物將焉適是謂身居
齋中心觀齋外客曰觀之道其在外乎曰仰焉天高
俯焉地下天焉上覆地焉下載覆者洋洋載者混混
瞻之在前顧之在下皆備於我不遺於物焉飛潑潑
魚躍昭昭不舍晝夜無間古今我知真切我見分明
及其至也察乎天地是謂極觀之力盡觀之道吾之
上居若是焉而已爾客曰微子吾不知觀矣夫觀之

道大矣非明易至非遠易到非高易廣非大易極子
之觀其諸異乎人之觀乎內焉不夜外焉不忒仰焉
無間俯焉無垠伏羲為師堯夫為友萬物為心八極
為目大哉觀也斯其至矣

斷

陳水部後齊斷

孰賢孰先孰哲孰前孰謙孰滿孰深孰淺孰過孰光
孰蓄孰長

讀

讀王昭君傳

畫可惡工不可賂分可守貌不可恃漢可思胡不可

樂可傳禮不可悖

讀洪武 聖政記

人謂 高皇之政如春雨臣謂如 日霖人謂 高皇
之令如迅雷臣謂如秋霜人謂 高皇之取天下如
漢臣謂如湯旱非霖曷蘇歲非霜 成暴非湯曷焚
書

與易士美

易士美尹海寧隴西胡績宗告曰不忠不明而忠不
公不忠不威而忠不廉不忠不慎而忠不果不忠不
勤而忠不達德量必宏德量不宏則為喜怒所遷事
長上必盡禮加禮不為也處同寮如兄弟不忌不驕

待吏卒如童僕莊以涖之慈以安田之遇鄉士夫必隆其禮敬而杜其請託與百姓交須推心置其腹中爲民弭盜須問民疾苦聽訟必虛以受其詞而平以折其心風俗有傷於倫理者請釐之勿曰姑俟我徐也過災必爲民請實貸征錢穀須有緩急要亦不可一於急也公文要事必記以簿籍庶取次行之而免小人沉塌臨事必有一定之規出令必有一定之時有規則事有條理有時則令有次第有條理則事易集有次第則令不壅

與馬宗大中丞

人不奉書啓問矣仰聞籌畫檢勦動止辛勞然功高

名重爲賊所畏而部下將士所過帖然大丈夫事無有出入萬萬也旌節駐紮威績宗之地也即當奔是問候乃以倉卒設備而又獨領州事相去甚近相關甚溼遂令績宗重負難過莫可逃避荷手教如聆清誨感感戰戰尚希便道嘉眉以終教益聞賊專事走避言多我情不知可合兵會謀一當其前一擬其後以成犄角之勝否邪又聞賊入夜以奔竄之勞軒輊頗孰不知可選精兵數百人別以物色使之夜襲以乘其不知否邪制勝尅敵想筭無餘策矣績宗何言喜尊眷至遜卿遷官久矣績宗何敢望遷也草草

寄王念憲先生

士無論得志與否但得知遇者爲之前乃可勵志以爲之後矣唐韓退之之於陸敬輿宋蘇子瞻之於歐陽永叔至今稱美焉臺下正已公人今時之敬輿永叔也但媿續宗踈慙愚懶不能猛省以學所以爲退之子瞻者爾教言耿耿在耳思所以報臺下者乃不敢不勉也得邸報見臺下又入薦章汲人無任稱慶以續宗在門下者亦何勝忻慰王都憲道夫葉侍御一之近皆得志行已無負於門下續宗碌碌守株猶夫樞趨時爾深恐踈放愚鈍不能知道夫一之以進於退之子瞻以無負於敬輿永叔也人便幸賜垂教

與張文林太守

山斗之私安得日侍起居以慰平生也朱子祠堂以蔡黃二先生從祀蔡尚矣不知勉齋先生畢竟何如今且列之蔡上抑不知有據否於鄙見則未安也紫陽山以章齋祀於其上是矣但在道家宮墻之內而又以朱子斜坐之於鄙見尤未安也於書院之從祀者詳考而改正之於道家宮墻區別而改作之是有望於執事也執事之見未必與鄙見不同改正改作因走之意而勇決爲之是有望於執事也倘別有議論幸不吝見教

與陳子學

兩得手書如覩顏面恨不能即席訂論以說平生爾
初以吾子發解爲慰繼又以吾子未舉進士爲歉然
出處有時儲養旣深發造必大於吾子厚有望焉走
初以轉官南都公暇必得讀書訪友以補不足今且
苟延放浪於身心了無寸益日後又不知成何次第
也蒙吾子見教勿事於班馬之文李杜之詩此嘗聞
於吾友何粹夫內翰今再聞於吾子恨此病根不能
盡除日來頗好讀書但資質愚下比少年時更覺喫
力爾京師有吾友楊伯晦其人樸而多學者也吾子
曾與一會甚喜余璞夫日與之講求甚密今又將西歸
與類以卷恨不備

寄彭尚書並翁書

宋有司馬文正公范文正公而宋稱盛非宋盛二文
正之勲業盛也 國朝稱盛於 敬皇帝朝於時有
王端毅諸公而執事與素翁亦已倚重於海內外表
表焉嶺袖縉紳今 明天子在位君實與希文復在
朝執事於家之將起於途之將至海內外兒童走卒
在在相爲問慰以爲執事一日未至海內外之望一
日未慰及執事入京而後鼓腹者加額者相望於野
大抵司馬相公復起 皇皇有宋自當復振耳續宗
竊喜我執事爲天下倚重若此可占 我明之盛又
在於今日也然續宗竊有獻焉國家之元氣昌於

孝廟深仁厚澤固非一二世所能斬但為武廟斷
洩太甚內羸而外耗元氣之存者如縷天生今上
起而復之蓋將綿延國祚也惟今之勢譬之病者初
起善醫者未敢加以大劑遽加以糲食惟徐徐以調
良之藥和淡之饌培養之耳培既厚養既壯元氣既
復於時或勸以高舉或勉以大振則既壯之身固非
風寒所能侵而既厚之氣亦非穀色所能入苟不俟
病者平復而即欲其一舉萬仞一步千里竊恐力不
支而行不逮則駁者將至於是其有議醫者矣醫日遠
致日衆竊又恐病者復作藥亦無及而醫將無功矣
一得之愚率爾上陳伏惟執事固自有調鈞之嘉猷

在書生之談何當上恬然非在門下則不敢也
寄幸翁

天欲平治天下乃生我 明天子起膺中興之期當
今之世為之輔弼左右余幸翁六七元老負天下
重望者其誰哉其誰哉是以海內外道路之人無不
加額騰懼如續宗奉在門下者又不能不為之稽首
稱賀也保愛 聖躬培養 聖德顧恤 國體確當
國論以深造我 明天子中興之業而底其全盛不
在六七元老邪不在執事邪借使不保不培不恤不
確而慙慙焉懇懇焉欲我 冲年之聖朝更一事暮
復一事朝去一人暮留一人是責效於旦暮者之為

耳非續宗之所敢知也執事計籌之詳矣余都司比
上之便秉燭草草

與林職方志道書

續宗啓別君子日夕去君子日遠矣日事簿書日景
能少憇不惟催科拙撫字亦拙方以負愧知已爲歉
而手書下教顧乃云 殆告者樂成人之美而莫知
其惡聽者樂與人之善而不見其罪也殊愧殊愧仰
惟有道君子既辛苦於賊未平之前復辛苦於賊既
平之後不問曾運甕與否而力自能勝大任矣敬服
敬服一日柄用以濟天下此非其發跡時邪前會
陽明先生兩次與講一二日令人豁然有貫通處恨

不及隨諸君子之後以盡向門戶也幸教之幸教之

與席元山司馬

及不至伊洛頗覺踈繆近幸見明道又覺爽健安得
甘坐春風而步庭草也郡志象山語要序承見教敬
聞命矣續密之語出于先正微執事生不併誤邪
寃錄有補於吾道其功不在陸下然執事云鳴寃蓋
有激也亦以起問者見是非也又曰亦物不平而鳴
也意亦切矣愚以爲象山之學知道者自能識之不
能識者不知道者也人何能寃象山象山亦何損於
人寃哉爲不知者言鳴寃可也苟有知者不必言
寃矣然象山可寃象山之不可寃寃在人不在象

山亦不在道請直書曰象山書語要或曰象山書
或曰象山錄如何特在教下空爾上布亮在不罪

鄉飲請書

夫莫不飲也而飲於鄉者必高年有德者焉美也
尊賢也先聖創之歷代因之我高皇帝嗣之其
與重矣夫賓上天地也介僕日月也三賓三光也四
面四時也其取象亦豈小哉伏惟執事樹勳宇朝
施澤十世邁德于鄉作則于家請與是飲於鄉有光
夫衣冠萃止俊秀環集絃歌既和觴已復勸我
家崇古導今之禮其惟執事倡焉敢啓

蘄州鄉飲請直書 少司馬儲 卷盛公



天鄉有飲尚德也賓有序尚齒也飲有尊尚爵也三
者備而其禮成矣夫飲有衆賓也而賓主僕介之禮
獨詳焉所重在賓在僕在介在主人耳夫尊者尊也傳
曰鄉人仕至大夫主人藉以樂賓所榮而遵法者也
故自賓視之若主而非主也自主視之若賓而非賓
也是以尊至賓主偕降迎焉傳不云尊之不與鄉人
齒也恭惟執事引疾于家待用于朝為鄉大夫師
表而其爵文與公等主人藉以遵法而取榮者其惟
執事哉敢再拜以請伏乞俯臨衆賓幸甚斯文幸甚
與甘泉先生書

續宗在史局因涇野宗伯得侍 先生光霽之下若

知趨向矣遷謫以來日奪于有司養既不深學因不
固心放而不知求者至今也優游四郡兩部四省之
間學既無得政亦無成且遷於爲文作字矣何可以
報程子何可以報程子曰者於留都已約何子魚同
趨欵教矣不意爲吳門諸士夫邀去竟得罪今猶悚
反也嗟乎續宗違執事日多去執事日遠矣雖得時
領二論二業之訓然孰若親炙者之有得乎續宗去
歲補汭方爾具狀馳問遽爲回祿所燬遂稽遲至今
今不能無罪伏乞照察然父濶之懷亦自惓惓也不
既

荅莊渠先生書

三復六書精蘊發前人所未啓啓後人所未發有天
道焉有地道焉有人道焉其圓其動天也其方其靜
地也其圓而動其方而靜人也而六書之義備矣古
人云文字生焉夫字猶文也理備而道該也今之人
以藝視字而理晦而道尼矣故隸作而字支楷作而
字悖其知六書乎其不知六書乎可慨也近見六書
本義及說文字原以爲得字之本與原矣及見精蘊
而後知字之學理邃而道宏非倉頡莫爲之始也請
早壽之梓以詔後之學者遠不能一侍几硯無任馳
仰海運誠不易復然東萊之通海則不可不復生近
已奏允矣容錄其奏以請教九河故道湮久矣誠

所當考容不日專使以詢以考以報也生繆撫東土
持重之教治病之藥石也敢不佩服

荅太宰湛甘泉公書

立德立言之教教續宗者遠矣佩服何勝銘感何勝
夫大聖立德大賢立功亦或立言然聖人之言經
賢人之言傳也六十四卦三百篇是也後世
三百篇之遺乎發乎情止乎禮義於名教未爲無
但不當品題雪月風花耳故淫奔之詩孔子亦不
刪樂府續宗誠不當作然亦出於一時乘興偶
上爲之耳非敢耽於吟咏而廢詩書也亦非敢工於
篇什而輟政事也初乘興時意以爲與其悶睡於輿

事若吟弄以與上而自不知其墮於末俗也數承
教及今知過矣今知過矣敢頓首謝

寄夫司馬浚川公書

承示佳什風風乎雷鍾之音白雪之調也三復之不
待入伊洛坐春風已領其指授矣敢頓首謝某伏讀
涯翁樂府竊疑古樂府何如是易也及讀房中鏡歌
續吹諸曲又見漢樂府何如是古也每欲通其句讀
輒畏難而止近於青兗之間輿上輒不揣擬得漢樂
府百有九十首類多淺俚涯翁之門且不敢望况漢
邪然亦一時意興也夫漢樂府類皆奏之郊廟播之
鼓吹至於相和又有清平瑟楚四調其格與調又皆

意在言外固三百篇之餘也魏繆襲晉傳玄已失其
本旨况元鐵厓邪近始見楊本無問格調與漢不同
關卷見辭旨即與漢異矣然漢去三百篇不遠後世
去漢遠無怪其不類也抑不知所見是否敢併請于
大雅君子門下伏乞俯而教之即立尺雪門下矣
爾上瀆死罪死罪

寄御史大夫何栢簡書

子日父失夫日遠矣媿何可言蓋不獲瀛
而巳矣媿何可
之治而

之道夫子獨處東山而棲白石豈其然哉豈其然
哉孟子未嘗不欲平治天下吾道蓋是也唯夫子圖
之其繆撫東土近二年循舊守常不異汲中茲改視
河亦不異東土知已大君子幸有以教我有言引沁
水自大堤內外至魚臺入漕者云沁安流也非若黃
河之散漫也又有言沁水可引但衛輝地下恐易北
奔耳然沁故道原不與河同茲欲自懷郡於堤南出
懷郡於堤北引之以避衛郡而趨濟郡不知何如幸
教之

與魏莊渠書

春到陽復君子作德樂道必有吾與點也氣象停雲

千里不能扼翹左右同事風浴懷仰何勝夫明道之志在天下天下之望在明道請早出以慰斯文以慰蒼生續宗叨撫東土如常叨總河如常漫無寸補政事不敢不勉問學不敢不勉但放心求之不專操之不力出入猶無時耳媿何可言字學草草奉復實無所得幸終教之

與凌戶部端甫

得手書如聆面誨咫尺千里何能為懷承以喪禮下及續宗何知古人居喪讀禮執事於禮既讀之孰且執之堅必能盡合於古矣然今之人動以行古禮為迂夫程子於洛陽舉行古禮化之者不止一二大家孰謂古禮不宜於今而以為迂哉惟執事居今之世執古之禮然於治主於治擲於治墓於治器於治祭必以朱子家禮為酌不合者釐而正之執事今日之事也計籌之詳矣續宗何知近時有家禮儀節有家禮會通其中有遷就增補處恐非朱子本意更與深考而新衷之如何

題

題儀禮後

考之于古禮為經記為傳其來尚矣宋王氏棄經而尚傳以至於今學者皆知有傳而經不傳下邑窮鄉之士且不知有經亦不知傳為經而作千載而下經

不將失傳邪觀諸河間獻王之三十九篇可慨矣用
是謀於屬邑沈氏教慈揚氏吳江王氏朝用相與
捐俸刻置郡齋慶將以廣其傳云高堂生禮經十七
篇吳澄逸禮經八篇十七篇賴朱子通解而不墜八
篇近出於吳氏旋復散失賴程氏敏政新安人旁求而始
得而文又多闕然則刻以求其傳是何可緩邪

題李詩絕句後

續宗始讀舉業書乃不知讀詩既讀詩又不知三百
篇之外讀李杜詩既讀李杜詩又苦無多李杜詩本
杜詩本稍多李詩唯 內府本為善而人不多得嘗
聞蜀今求之亦不得續宗刻之力不暇及故先

絕句云

題傅氏影堂

尚爾節仰爾壽用昌大爾後

題顏直卿麻姑碑

魯公之書充溢宇宙者多矣近時所最傳者曰麻姑
碑頌曰東方曼倩碑贊曰多寶塔碑文曰麻姑碑詩
並為世珍夫右軍而後以書名者其惟顏也其勁
柳其潤如虞其嚴如歐陽而其逸出于王是則不可
及爾今觀其頌如鳳飛鸞舞於青霄白日之表無復
巧雲奇霧之掩映觀其贊如大人君子正衣冠而坐
高堂廣宇之上望之者斂容觀其文如淑人吉士整

儀蕭威而入朝廟觀其記如精金粹玉星列于盤
而文響秩然古今言書法者式焉夫自唐至今不
知其幾千百載矣而魯公之刻大者小者新者舊者
相望而出相寶而傳直與日月相照耀豈以其書端
自有不可泯者在邪抑以其人本自有不可磨者在
邪是帙 官保梧山李公所藏然尚有碑陰一通更
索而續之並為觀法焉

題范文正公二手書

展玩二書令人儼然生敬夫人當珍藏之者且備其
子與孫哉文正公為當朝人物第一而書中所言又
置義田衛生之善贍族卹人仁莫上公焉其結與字又
醇雅嚴勁不雜不流公是之謂文正也二書而四美
具焉人無不敬而珍之者是其子孫孫世守之
而倚以為重也

題五老小像

吾觀柱太師有休休之容焉王亞卿有恢恢之象焉
畢司農有閑閑之度焉朱介部有翬翬之風焉馮駕
部有悠悠之思焉吾想其集而咏咏而和也須眉皓
首不與世同山中野服不為物累可以敦俗可以勵
士傳之千載不暢然興懷邪

題伍刑部梅雪卷

續宗與寒泉枳田約遊西山尋所謂梅花萬樹者

矣而竟不果每談及暢然興懷今觀寒泉是卷飄然
如在西山之嶺下俯洞庭之奇震澤之秀而聞黃鶴
之音梅英粲粲雪點踈踈詩什翩翩大人君子之樂
不在是哉不在是哉

題明妃出塞圖

是圖也陋漢邪罪延壽邪悲明妃邪一女子不足惜
然終不可恃豈策哉一事不足多然欺且悖矣豈道
哉佞臣蔽上明君交外婦人事入者也而况君父之
令哉固命也抑分也亦安之而已矣

題李公筆畫臨本後

存近予過當塗或改刻之畫雖新而李公筆意未
其四五矣予為是惜乃不揣暇日為臨一過視初本
減小焉因付長洲章荅刻之石然於李公筆意亦未
得其一二特以其石稍賴以不遂磨滅焉耳

跋

夏小正解跋

續宗嘗讀大戴禮而見是篇簡也而非略也微也而
非隱也天人之禮君民之事咸備焉盖古書也夫簡
而該微而彰後人之所不逮也升菴楊子直以為古
書信矣今見其解或得其大義或得其奧旨或不得
其錯句訛字夫得其說則信不得其說則疑信則信



疑則疑而其理與事固皆可考可以開來學矣可以傳矣升菴子之爲是書其有功哉乃因龍尾揚子之命而遂付之刻者隴西胡纘宗跋

李詩近體跋

律詩出唐以後非古也今世讀律而遺古者衆矣詩自四言而五言而六言而七言自風雅頌而離騷而古體而近體其變極矣知詩者雖遺律而不傳不習亾傷也宋以前稱詩者必曰唐稱唐詩者必曰李杜而今世多讀杜詩豈以杜詩近體多於李詩適中今時之好邪今觀李詩近體雖僅百首而其天才俊麗不可短燮試讀之夫豈在杜下哉特人未多見亦未

遺古而尚今自任其咎哉同刻者又有李詩全集杜詩全集李詩絕句云

凱雅跋

畿外民弗馴蔓及汲中以至江下 帝命大中丞羣
蘭彭公伐而綏之逾年而功成蜀中民弗馴伐蜀者
難之 帝求其人廷臣僉以公請公又伐而綏之逾
年而功成西戎哈密入寇司馬以征伐請 帝難其
人廷臣復薦公公又伐而靖之逾月而功成 帝以
公久於外重念之用徵公於都察院蒞院事六續屢
奏公不以爲功屢頒公不以爲勞 帝今倚用之

者有以哉公北上也南都諸公卿大夫士咸推贊焉
所為詩與歌若賦翩翩乎有以章矣續宗何言

跋易比部世藏手卷後

人以是卷之失而復得判而復合為奇予以是卷之
遇比部為不偶人以是卷之出於解公所作為不易
予以卷中所稱某見信于文公某見知於解公為難
蓋失則得判則合事固有然者使非比部孰從而得
之又孰從而合之宋節士雖多鮮有如文山者也
國朝才人亦衆矣若解公亦鳴世者某某必其才行
卓偉有足奇重是以見取於二公宜乎一再世而有
比部也夫得與合奇矣然必不再失與判而后為能

其不可得矣然必世有讀書如吾比部者而
為能嗣易氏子孫繼比部而興起者其最請比部以
善傳與予同年舉進士為海寧令進南京比部主事
員外郎中文行煥然有聲留都可以為易氏世傳者
蓋不獨是卷也

阮詩跋

籍者何魏步兵也何載在晉史籍嘗却婚司馬氏六
固魏人也非晉人也其為籍何容體瓌梧志氣宏放
者也何不見取於世蓋嘗譏誚當時矣而又縱酒是
以棄耳何又有取於君子籍也倦倦王室立心畧同
於靖節故與嵇叔夜並稱其所為詩何漢之餘魏

倡也其辭多隱避奈何嗣宗身處變世故志雖在刺
譏乃不敢顯言爾何爲取其詩渾厚醞藉洋洋充耳
雖鏤者失其奇劇鉢者失其工矣其以詠懷名篇何
詩言志志之所發者懷也何縱於酒昏酣玩世因詩
以見志可以知嗣宗之心矣何取于八十一篇而刻其
詩唐詩刻多矣皆不在嗣宗上而嗣宗闕焉不容以
不刻矣

跋應奎山聯句後

是日也關隄寺觀諸生射登應奎山易置學地而石
磐張子倡之東岳沈子及續宗隨焉夫關寺斥異端
也觀射學古人禮也登山望道也易地去其不善而
就其善也異端斥吾道崇矣禮脩吾身檢矣見道知
善吾人之趨端矣是行也一舉而數事備焉不亦益
哉其詩六章賦也有興焉陳尹克宅請志之因志之
而張子之教濟矣可泉居士胡續宗醉後跋

跋漢詩後

讀詩者一則曰漢魏二則曰漢魏平時讀漢魏詩以
爲魏猶漢也及讀樂府則漢自爲漢而魏不能及矣
試咏之漢鏡歌相和諸曲渾厚雋永無媿於古歌謠
辭魏詩可讀者三曹爾矣然操丕植固漢人也故附
之漢苟評前代之詩亦唯曰漢而已矣自漢而戰國
而春秋三百篇可馴致也

跋李詩後

唐詩古體曰陳李近體曰李杜尚矣王孟高岑諸子亦稱大家然不能及也李詩杜子美亟稱之曰不群曰無敵曰飄逸清新見之既真品之亦切矣夫李天才雋拔不可矩矱自爲有唐一人豪賀知章呼爲謫仙諒哉然杜易學李難學學杜如學顏學李如學孟孟子氣象大李才高學道者學孟無進步處學詩者學李無下手處故曰李多天仙之辭

跋右軍十七帖後

往歲或自汲寄此石帖於續宗云新得之野寺中者以爲已勝今時所傳諸刻矣及於蔣侍御伯宣所獲此本則又見其風神清逸骨體遒勁逼真右軍手筆近時所傳諸刻遠在下風矣徐 殿讀子容以爲然暇日手臨一過周郡丞少安云此須傳之人人因託長洲章生簡甫摹之石與諸學王者共焉郡丞雍人侍御 殿讀吳人

東洋圖書印



東洋圖書印



上海圖書館藏

